

NAQQIUT

Inatsisissatut siunnersuutip kalaallisoortaa 24. september 2012-imeersoq taarserpaa.
(Aalajangersakkani soorlulusooq oqaaseqaatini kalaallisoortaannaani kukkunersiuilluni naqqiissutininik arlalinnik suliaqartoqarpoq.)

Uunga siunnersuut: Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. xxyy- xxx 2012-meersoq

Kapitali 1

Atorneqarfia

Takornariartitsinermi niuerutit, takornariartitsinermi sammisat aamma akuersissutit ilaallu ilanngullugit.

§ 1. Inatsisartut inatsisaata atuuffissai tassaapput suliffeqarfinnut takornariartitsisartunut, pisinnaatitsissummik pigisaqartunut, ingerlatat suliffeqarfinnut takornariartitsisartunut, takornariartitsinermi niuerutinut, takornarianut aamma takornariartitsinermi ingerlatanut akuersissutinut ilaasunut inatsisartut inatsisaat akuersissutinut atuutissaaq.

Imm. 2. Inatsisartut inatsisaat sukisaarsaatigalugu aalisarnissamut akuersissutini ilaasut inatsisartut inatsisaanni ingerlatanut ilaasunut atorneqassanngilaq.

Illuutit, sanaartukkat, ilusilersukkat, aqqusernit attaveqaatillu allat

§ 2. Inatsisartut inatsisaata atuuffigai illut najugaqarfiusut, illuutit allat, sanaartukkat, ilusilersukkat, aqqusernit attaveqaatillu allat, takornariartitsinermi niuerutinik inatsimmut ilaasunik neqerooruteqarnermut, tuniniaanermut imaluunniit takornariartitsinermi niuerutinik tunisinernut atatillugu.

Kapitali 2

Nassuiaatit

Takornariat, takornarianut niuerutit aamma takornariartitsinermi ingerlatat pillugit nassuiaatit

§ 3. Takornariartoq tassaavoq, inuk takornariartitsinermi nioqqutissamik pisinissani pillugu isumaqatigiissuteqartoq.

Imm. 2. Takornariartitsinermi nioqqutissaq tassaavoq, kiffartuussut akiliuteqarnikkut

tunniunneqartoq takornariatitsinermilu ingerlatamik ataatsimik arlalinnilluunniit periarfissaqarluni tunniussineq ilanngullugu, tak. imm. 3.

Imm. 3. Takornariatitsinermi ingerlatat inatsimmi matumani ingerlataq tassaavoq sukisaarsaatigalugu siunertaqarluni akiliuteqarnikkut inuussutissarsiutigalugu suliaqartumit neqeroorutaasartoq.

Takornariatitsinermi sammisaqarnernut akuersissutit aamma pisinnaatitaanermik pigisaqartoq

§ 4. Takornariatitsinermi sammisaqarnernut paasineqassapput takornariatitsinermi nioqutissamik arlalinnilluunniit tunniussisinnaatitaasoq sumiiffimmi tigussaasumi aalajangersimasup iluani. Takornariatitsinermi sammisaqarnernut akuersissut pisinnaatitaanermik pigisaqartumut tunniunneqartarpoq.

Imm. 2. Pisinnaatitsissummik pigisaqartoq tassaavoq inuk imaluunniit suliffeqarfik akuersissummik pissarsereernermi pisinnaatitaasoq pisussaaffeqartorlu.

Ingerlatat takornariatitsinermi sammisaqarnissamut akuersissummut ilaasut

§ 5. Ingerlatat takornariatitsinermi sammisaqarnissamut akuersissummut ilaasut tassaapput ingerlatat takornariatitsinermi nioqutissanik, takornariatitsinermilu ingerlatanut tamakkununga attuumassuteqartunik tunniussisinnaanermut pisariaqartinneqartut.

Imm. 2. Ingerlat suut akuersissummut ilaatinneqassanersut pillugit killilersuutinik Naalakkersuisut aalajangersaasinnaapput, tak. imm. 1.

Kapitali 3

Akuersissuteqarnissamut piumasaqaatit

§ 6. Takornariatitsinermi nioqutissanik tamakkunungalu atatillugu kiffartuussutit pillugit, sumiiffimmi arlalinnilluunniit akuerissuteqarnissamut piumasaqaatinut ilaasunik tunniussisinnaanerit pillugit Naalakkersuisut aalajangersaasinnaapput.

Imm. 2. Takornariatitsinermi nioqutissaq sumiiffimmut akuersissuteqarnissamut piumasaqaatinut ilaappat, takornariatitsinermi nioqutissaq taamaallaat takornariatitsinermi ingerlataqarnissamut akuersissut takornariatitsinermi nioqutissamut sumiiffimmullu sammisamit ilaasoq taamaallaat tunniunneqarsinnaavoq.

Imm. 3. Sumiiffimmut akuersissuteqarnissamut piumasaqaat pinngitsoortitsissanngilaq ingerlatat sumiiffimmi ingerlanneqarsinnaanissaannut, tamakku isumagissallugit akiliisoqarsimanngikkaluartoq. Kinaluunniit sumiiffimmi ingerlatanik taamaattunik isumaginnissinnaavoq, inatsisartut inatsisaannit matumanga imaluunniit inatsisit allat imaluunniit aalajangersakkat allat tamakkuninnga aalajangiisimanngippata.

Imm. 4. Sumiiffimmi takornariatitsinermi nioqutissamut akuersissuteqarnermi piumasaqaat

pinngitsoortitsissanngilaq, takornariatitsinermi nioqqutissanik allanik tamatumunngalu atatillugu kiffartuussutinik allanik tamatumunnga attuumassuteqartunik sumiiffimmi tunniunneqarsinnaasut.

Kapitali 4

Akuersissutinik tunniussineq

Takornariatitsinermi sammisaqarnissamut akuersissutinik tunniussisarneq akuersissummullu piffissaliussaq

§ 7. Sammisamut erseqqinnerusumik killilerneqarsimasumut erseqqinnerusumillu piunasaqaatinik aalajangerneqarsimasunut takornariatitsinermi nioqqutissamik arlalinnilluunniit tunniussinissamut Naalakkersuisut akuersissummik tunniussisinnaapput, tak. § 6, imm. 1 (takornariatitsinermi ingerlatamut akuersissut). Takornariatitsinermi ingerlatassamut akuersissut kisermaassiffiusussatut tunniunneqassaaq.

§ 8. §7 malillugu takornariatitsinermi ingerlatassamut akuersissut periutsit imm. 2-3-mi taaneqartut arlaannut tunniunneqarsinnaavoq.

Imm. 2. Akuersissummik tunineqarnissaq pillugu tamanut nalinginnaasumik qinnuteqartoqartitsineqareerpat akuersissut tunniunneqarsinnaavoq (neqerooruteqartitsineq). Qinnuteqartoqaaqquilluni nalunaaruteqarneq, qinnuteqarnissamut piffissaliussaq ikinnerpaamik ullunik 45-inik sioqqutsisumik Naalakkersuisut nittartagaatigut allatulluunniit Naalakkersuisut tamanut saqqummiutissavaat. Neqeroorummi tunngaviussaaq, pilersaarusiormi oqartussaasup susassaartup, sumiiffik pineqartoq takornariatitsinermik ingerlataqarnissamut pilersaarusiormi figisimassagaa, kiisalu ingerlatat suut akuersissummut ilaatinneqassanersut aalajangersarsimassallugit.

Imm.3. Sumiiffimmut akuersissuteqarnissamik nalunaaruteqarneq imm. 2 malillugu siumut qinnuteqaaqquisoqarsimatinnagu tunniunneqarsimassappat, sumiiffillu pineqartoq pilersaarusiormi oqartussaasup susassaartoq sumiiffik pineqartoq takornariatitsinermi ingerlatanut pilersaarusiormi managu, Naalakkersuisullu isumaqarpata qinnuteqaat suliarineqartariaqartoq, qinnuteqaat pilersaarusiormi oqartussamut Naalakkersuisut ingerlateqqissavaat, apeqquteqaatigissallugulu pilersaarusiormi oqartussaasup sumiiffik qinnuteqarfigineqartoq takornariatitsinermi ingerlatanut ilanngunneqassanersooq kissaatigineraa. Pilersaarusiormi oqartussap sumiiffik qinnuteqarfigineqartoq tamakkiisumik ilaannakortumilluunniit takornariatitsinermi ingerlataqarnermut pilersaarutiginiarlugu ilanngunniarlugulu kissaatigisimappagu, akuersissummik tunniussinissaq siunertarlugu Naalakkersuisut immikkut ittumik innuttaasunut ammasumik qinnuteqaaqqusisinnaapput.

Imm. 4. Imm. 3 malillugu qinnuteqarnermi, pilersaarusiormi oqartussaasup apeqquteqaatip tigoreernerani ullut 90-it qaangiutsinnagit Naalakkersuisut apeqquteqaataat

akissuteqarfigissavaa.

Imm. 5. Qinnuteqaatit periutsit imm. 2-3-mi taaneqarsimasut malillugit qinnuteqaatit tunniunneqarsimasut tunngavigalugit Naalackersuisut akuersissummik tunniussinngitsoorsinnaapput.

§9. §7 malillugu takornariartitsinermi ingerlatassanut akuersissut toqqartuisarnermi piumasaqaatit imm. 2-6-imi taaneqartut tunngavigalugit tunniunneqassaaq.

Imm. 2. Qinnuteqartup suliaqarfimmut ilisimasai, tamakkununga ilaallutik qinnuteqartup takornariartitsinermi nioqqutissanik taamaattunik allanilluunniit imaluunniit kiffartuussutinik allanik assingusunik neqerooruteqarneq, tuniniaaneq tunniussisarnerlu eqqarsaatigalugit siusinnerusukkut misilittagai.

Imm. 3. Qinnuteqartup aningaasarsiornikkut tunuliaqutaa.

Imm. 4. Periuseq qinnuteqartup takornariartitsinermi nioqqutissap imaluunniit nioqqutissat qinnuteqaammut ilaasut qanoq ililluni tunniunnissaannut siunertaqarnersoq pillugu qinnuteqartup ingerlataqarnissaminut missiliuutaani uppersarnerneqarsimasut, tamakkununga ilaallutik:

- 1) Qinnuteqartup nioqqutissamik nittarsaassisinnaassusia kiisalu tuniniaaffissanik sunniuteqartunik pilersitsisinnaassusia.
- 2) Qinnuteqartup suliffissanik pilersitsinissaminut kiisalu isumaqatigiissusiornermi, pilersuinermi kiffartuussutinilu pilersuisunik nunaqavissunik atuinnissaminut piumassuseqarnera piginnaasaalu.

Imm. 5. Taamattaq Naalackersuisut qinnuteqartunik toqqartuisarnermi piumasaqaatit imm. 2-5-imi taaneqartut malillugit naliliinermi naligiissutut nalilerneqartut akornanni inaarutaasumik toqqaanissaq siunertaralugu toqqartuinermi piumasaqaatit tulluuttut allat, nammineq isummanik aallaaveqanngitsut kinaassusersuinngitsullu allat aalajangersinnaavaat.

Imm. 6. Piumasaqaatit imm. 2-5-imi tamakkulu akornanni imminnut pingaarnersiorneri pillugit aalajangersakkat §8, imm. 2-3-mi taaneqartuni qinnuteqaqqusinerit ilanngullugit tamanut saqqummiunneqassapput.

Pilersaarusiorneq aamma nunaminertanik atuisarneq pillugu inatsisartut inatsisaat kiisalu inatsit malillugu pilersaarutit aalajangersakkallu

§ 10. Takornariartitsinermi ingerlataqarnissamut akuersissut taamaallaat sumiiffimmut tunniunneqarsinnaavoq, akuersissut malillugu ingerlatat isumagineqarneranni pilersaarusiortarneq aamma nunaminertanik atuisarneq pillugu inatsisartut inatsisaat kiisalu inatsit malillugu pilersaarutit aalajangersakkallu allat aalajangerneqarsimasut aammalu inatsit malillugu aalajangerneqarsimasut malillugit ingerlanneqassappata.

Imm. 2. Pissutsit imm. 1-imi ilaatinneqartut pillugit aalajangernerit pilersaarusiortarneq kiisalu nunaminertanik atuisarneq pillugu Inatsisartut inatsisaat malillugu kommunalbestyrelsimit imaluunniit Naalackersuisunit aalajangerneqassapput.

Akuersissummut piffissaliussaq

§ 11. Takornariartitsinermi ingerlatanut akuersissut ukiut 5-it angullugit tunniunneqartarpoq, takuulli imm. 2.

Imm. 2. Akuersissut ukiut 20-t angullugit tunniunneqarsinnaavoq, ingerlatassanut pilersaarutit isumaginissaannut pisariaqartinneqartutut kiisalu aningaasarsiornikkut sinneqartooruteqarnissamik periarfissaqartutut isumaqarfigineqarpata.

Imm. 3. Akuersissuteqarnermi piffissaliussap qaavatigut ukiut 5-t angullugit akuersissuteqarneq Naalakkersuisut sivitsorlugu tunniussinnaavaat. Piumasaqaatit allangorneri tunngavigalugit sivitsuineq tunniunneqarsinnaavoq. Sivitsuineq arlaleriartumik tunniunneqarsinnaavoq.

Imm. 4. Akuersissummut ataatsimut piffissap katinnera ukiut 30-it sinnersinnaanngilaa.

Kapitali 5

Pisinnaatitsissummik pigisaqartoq

Suliaqarfitsigut piginnaasat aningaasarsiornikkullu tunuliaqut

§ 12. Takornariartitsinermi ingerlataqarnermut akuersissut malillugu pisinnaatitsissummik pigisaqartoq ingerlatanut akuersissummut ilaatinneqartunut suliaqarfitsigut piginnaasanik aningaasarsiornikkullu pisariaqartitanik tunuliaquteqarnissaa pisariaqarpoq.

Pisinnaatitsissummik pigisaqarsinnaasut

§ 13. Takornariartitsinermi ingerlataqarnissamut akuersissut inummut, tak. § 14, imaluunniit suliffeqarfimmu, tak. § 15, tunniunneqarsinnaavoq.

Inuk akuersissummik pigisaqartutut

§ 14. Takornariartitsinermi ingerlataqarnermut akuersissut inummut piumasaqaatinik makkuninnga tamanik eqquutsisisumut taamaallaat tunniunneqarsinnaavoq:

- 1) Inuk piffissami katillugit ikinnerpaamik ukiut marluk sioqqullugit ilaatinneqartunut Kalaallit Nunaanni inuit allattorsimaffiat malillugu najugaqarsimasoq.
- 2) Inuk inuit allattorsimaffiat malillugu Kalaallit Nunaanni najugaqartoq.
- 3) Inuk Kalaallit Nunaanni tamakkiisumik akileraartussaataasooq.
- 4) Inuup aningaasatigut pisuussutiminik tamakkiisumik atuisinnaatitaasooq, tamatumunngalu atatillugu akilersuinerminik unitsitsisimassanani, akiliisinnaajunnaarsimassanani imaluunniit tamakkununnga nallersuussinnaasunik inissisimassanani.

Imm. 2. Inuk akuersissut malillugu pisinnaatitsissummik pigisaqartoq, piffissaq akuersissuteqarfiusoq tamaat imm. 1-imi piumasaqaataasut eqquutsissimassavai.

Suliffeqarfik pisinnaatitsissummik pigisaqartutut

§ 15. Takornariartitsinermi ingerlataqarnissamut akuersissut taamaallaat suliffeqarfimmut piunasaqaatinik makkuninnga eqquutsitsisumut tunniunneqarsinnaavoq:

- 1) Suliffeqarfik aktieselskabiussaaq imaluunniit anpartselskabiussaaq Kalaallit Nunaanni angerlarsimaffeqartutut nalunaarsorsimasoq.
- 2) Suliffeqarfik aningaasatigut pisuussutiminik tamakkiisumik atuisinnaatitaasoq, tamatumunngalu atatillugu akilersuinerminik unitsitsisimassanani, akiliisinnaajunnaarsimassanani imaluunniit tamakkununnga nallersuussinnaasunik inissisimassanani.

Imm. 2. Suliffeqarfik akuersissut malillugu pisinnaatitsissummik pigisaqartup piffissaq akuersissuteqarfiusoq tamaat imm. 1-imi piunasaqaatit eqquutsittussaavai.

Kapitali 6

Namminersorlutik Oqartussanut oqartussanulluunniit allanut akiliutit

§ 16. Takornariartitsinermi ingerlataqarnissamut akuersissummik pisinnaatitsissummik pigisaqartoq Namminersorlutik Oqartussanut imaluunniit oqartussanut allanut akiliuteqartassasoq Naalakkersuisut malittarisassanik aamma akuersissuteqarnissamut piunasaqaatit pillugit aalajangersaasinnaapput. Tamatumunnga atatillugu aalajangersarneqarsinnaavoq akuersissummi nunaminertap angissusia tunngavigalugu naatsorsuereernermi akitsuummik akiliisoqartassasoq (nunaminertamut akitsuut), akuersissut malillugu ingerlatat malitsigisaannik pisinnaatitsissummik pigisaqartup kaaviiartaataasa amerlassusai tunngavigalugit naatsorsuinikkut akitsuummik akiliisoqartassasoq (kaaviiartitsinermit akitsuut), akuersissut malillugu ingerlataqarnerit malitsigisaannik pisinnaatitsissummik pigisaqartup aningaasarsiornikkut sinneqartoorutitigut pissarsiarisaasa amerlaqataanik akitsuummik akiliisoqartassasoq (sinneqartoorutinit akitsuutit) imaluunniit taakku ilaat imaluunniit taakku tamakkerlugit akuleriisinnerisigut.

Kapitali 7

Pisinnaatitsinermik pigisaqartup pisussaaffii

Ingerlataqarnissamut pilersaarutit

§ 17. Takornariartitsinermik ingerlataqarnissamut akuersissut malillugu ingerlataqarnissamut pisinnaatitsissummik pigisaqartup pilersaarutai, tamakkununnga ilaallutik illuutininik aamma sanaartukkanik ilaallu ilanngullugit pilersitsineq atuinerlu (ingerlataqarnissamut pilersaarutit) ingerlatat aallartinneqannginneranni Naalakkersuisunit akuerineqaaqqaarsimassapput. Pissutsit allanngorneri pisariaqartitsippata, pilersaarutit allanngortinneqarneri pillugit

pisinnaatitsissummik pigisaqartup Naalakkersuisunut akuerineqartussanngorlugit nassiutissavai.

*Pisinnaatitsissummik pigisaqartup nalunaarusiortarnera paasissutissanillu
nalunaaruteqartarnera*

§ 18. Pisinnaatitsissummik pigisaqartoq ingerlatat akuersissummut ilaatinneqartut pillugit akuttunngitsumik Naalakkersuisunut nalunaarusiortassaaq.

Imm. 2. Pisinnaatitsissummik pigisaqartup nalunaarusianik nassiussisarnera paasissutissanillu nalunaaruteqartarnera pillugu malittarisassanik akuersissuteqarnermilu piumasaqaatinik erseqqinnerusunik Naalakkersuisut aalajangersaasinnaapput.

Kapitali 8

*Akuersissuteqarnek malillugu takornariatitsinermi ingerlatat pillugit ingerlatallu
taamaatinneqarneranni pisussaaffiit*

§ 19. Pisinnaatitsissummik pigisaqartoq akuersissut malillugu ingerlatat unitsinnerini illuutinik sanaartukkanillu ilaallu ilanngullugit piginnaatitsissummik pigisaqartup pilersissimasaanik paaassasoq pillugu Naalakkersuisut malittarisassanik akuersissuteqarnermilu piumasaqaatini aalajangersaasinnaapput, kiisalu sumiiffimmi kallarneqartumi saliiinermik isumaginnissasoq, kingornalu nalunaarsuinermik assigisaannillu isumaginnissasoq (nakkutilliineq).

Imm. 2. Ingerlatsinissamut pilersaarummi imaluunniit ingerlatsinissamut pilersaarutit allanngortinneqarneranni, tak. § 17, Naalakkersuisut akuersissuteqarnerminni pisinnaatitsissummik pigisaqartup imm. 1 malillugu pisussaaffimminik eqquutsitsinissaata qulakkeerinninnissaa pillugu piumasaqaatinik aalajangersaasinnaapput, tamakkununga ilaallutik qularnaveeqqusiinissaq pillugu. Pissutsit allanngortinneqarneranni pisariaqartitsineqassappat, tamakkununga ilaallutik illuutinik imaluunniit sanaartukkanik ilaallu ilanngullugit allanngortitsinermi imaluunniit alliliinermi, piumasaqaatit allanngortinneqarmissaat Naalakkerkkersuisut aalajangersaasinnaapput, tamakkununga ilaallutik qularnaveeqqusiinerit allanngortinneqarneri pillugit.

Imm. 3. Iliuusissat imm. 1-imi taaneqartut pillugit peqquneqarnerit pisinnaatitsissummik pigisaqartup eqquutsinngippagit, Naalakkersuisut pisinnaatitsissummik pigisaqartup akiligassaanik aarlerinaatinilu akisussaaffissaanillu iliuusissanik isumaginnissinnaapput.

Kapitali 9

*Takornariatitsinissamut ingerlataqarnissamut akuersissutitip tunineqarnera,
atorunnaarsinneqarnera taamaatinneqarneralu*

§ 20. Takornariatitsinermi ingerlatassanut akuersissummik toqqaannartumik toqqaannangitsumilluunniit tunisineq pisinnaanngilaq, tunisinissaq Naalakkersuisut

akuerisimangippassuk.

§ 21. Sunik pisoqartillugu akuersissutip atorunnaarsinneqarnissaa imaluunniit Naalakkersuisunit utertinneqarsinnaanera pillugu akuersissummik tunniussinermi piumasaqaatit Naalakkersuisut aalajangersaassapput.

§ 22. Pisinnaatitsissummik pigisaqartup pisussaaffii qanoq annertutigisumik atatiinneqassanersut imaluunniit piginnaatitsissummik pigisaqartup akuersissutip taamaatereernerani qanoq allanik pisussaaffeqassanersoq pillugu Naalakkersuisut malittarisassanik akuersissuteqarnermilu piumasaqaatinik aalajangersaasinnaapput.

Kapitali 10

Sillimmasiinikkut matussusiinissaq aamma sillimmasiissuteqarnissaq

§ 23. Akusersissummik tunniussinermi Naalakkersuisut piumasaqaatit pisinnaatitsissummik pigisaqartumut piumasarinnaavaat pisussaaffiit akisussaaffiillu sullimmasiinikkut allatullunniit qularnaveeqqusiinikkut qularnaveeqquserneqarsimassasut.

Imm 2. Akusersissummik tunniussinermi Naalakkersuisut piumasaqaatit piumasarinnaavaat, pisinnaatitsissummik pigisaqartoq peqqissutsimik sullinneqarnermik pissarsinissani pillugit peqqinnissaqarfimmik isumaqatigiissusiortussaasoq, tamakkununga ilaallutik ajutoornermi takornarianik aallarussisarnissaq, kiisalu tamakkununga aningaasartuutit matussusernissaannut sillimmasiineqassasoq.

Kapitali 11

Piumasaqaatit nalinginnaasut

Ingerlatanut piumasaqaatit nalinginnaasut

§ 24. Ingerlatat akuersissummut ilaasut siunertaqartumik kiisalu isumannaallisaaneq, peqqissuseq avatangiisillu eqqarsaatigalugit illersorneqarsinnaasumik ingerlanneqassapput.

Nakkutilliineq, peqqussuteqarneq paasisutissanillu nalunaaruteqartarneq

§ 25. Naalakkersuisut akuersissummik, pisinnaatitsissummik pigisaqartumik, ingerlatanik pissutsinillu inatsimmuut imaluunniit akuersissutinut ilaasunik nakkutilliisuupput.

Imm. 2. Inatsisartut inatsisaannik, inatsisartut inatsisaat malillugu aalajangersakkanik kiisalu akuersissuteqarnermi piumasaqaatinik eqquutsitsinissaq pillugu Naalakkersuisut peqqussuteqarsinnaapput. Peqqussutit pisinnaatitsissummik pigisaqartumut inatsisartut inatsisaannut ilaasumut tunniunneqarsinnaapput. Nakkutilliisutut oqartussat sulisui suliffeqarfiup ilaanut tamanut ingerlatanullu inatsisartut inatsisaanut matumunnga ilaasunut

qaqugukkulluunniit eqqartuussivimmit akuersissummik pissarseqqaaratik naammaginartumik kinaassutsimik uppersaateqarlutik isersinnaatitaapput, nakkutilliinermi suliassat isumagissallugit tamanna pisariaqartinneqarpat.

Imm. 3. Pisinnaatitsissummik pigisaqartup paasissutissat sulluunniit ingerlatanut inatsimmut akuersissummullu ilaatinneqartut oqartussatut suliarinninnermi pisariaqartinneqartut tamaasa nalunaarutigisassavai. Naalakkersuisut inatsisartut inatsisaanni ilaatinneqartunik oqartussatut suliarinninnissaq ingerlanniarlugu pisinnaatitsissummik pigisaqartoq paasissutissanik nassiusseqqullugu peqqusinnaavaat, Naalakkersuisut pisariaqartitaattut isumaqarfigisaat malillugu ilusilerlugit.

Oqartussat aningaasartuutaannik utertitsisarneq

§ 26. Sulianik suliarinninnermut atatillugu kiisalu inatsisartut inatsisaat malillugu oqartussatut suliarinninnermut allanut aningaasartuutit pisinnaatitsissummik pigisaqartup akilertussaavai. Akiliut sullinneqarnermi akiliutitut imaluunniit aningaasartuutunik utertitsinertut akileqquneqarsinnaavoq.

Takornariatitsinermi ingerlataqarnermut akuersissuteqarnermut, akuerisaanermut imaluunniit oqartussatut suliarinninnermut il.il.inatsisit allat malillugit piumasaqaatit

§ 27. Inatsisartut inatsisaat malillugu akuersissutit, akuerisaanerit aamma oqartussatut suliarinninnerit piginnaatitsissummik pigisaqartumut inatsisit allat malillugit akuersissutinut, akuerisaanernut aamma oqartussatut suliarinninnermut piumasaqarfigineqarmissaminut pinngitsoortitsisinnaangilaq.

Kapitali 12

Pineqaatissiissutit aamma atuutilerfissaa

§ 28. Kinalunniit piaaraluni imaluunniit annertuumik mianersuaalliornikkut ima iliortoq akiligassinneqarsinnaavoq:

- 1) § 6, imm. 1 unioqqutillugu takornariatitsinermi ingerlatanik neqerooruteqartoq imaluunniit tunisisoq.
- 2) Inatsisartut inatsisaat malillugu akuersissummi tunniunneqarsimasumi piumasaqaatinik, inatsisartut inatsisaat malillugu aalajangersakkanik imaluunniit akuersissummi piumasaqaatinik aalajangersakkanik unioqqutitsisoq.
- 3) paasissutissanik § 18, imm. 1 malillugu peqquneqarnermik nalunaarutigineqarsimasunik imaluunniit akuersissuteqarnermi piumasaqaatinik oqartussat pissarsiassatut piumasaqaataannik eqqunngitsunik imaluunniit pututitsiniutunik nalunaarutiginnittoq imaluunniit paasissutissanik nipangiussisoq, imaluunniit
- 4) § 25, imm. 2 imaluunniit 3 malillugit peqquneqarnermik nalunaarutiginninnermik

piviusunngortitsinissamik eqquutsitsinngitsoortoq.

Imm. 2. Inatsisartut inatsisaat malillugu maleruagassani aalajangerneqarsimasuni, maleruagassanik unioqqutitsineq akiliisitaanermik pineqaatissiisoqarsinnaasoq aalajangersarneqarsinnaavoq.

Imm. 3. Inatsisartut inatsisaat imaluunniit inatsit malillugu maleruagassat aalajangerneqarsimasut pisinnaatitsissutaannik akiliisitsinissamik pineqaatissiineqarpat, akiliisitsineq inatsisit malillugit inummut Kalaallit Nunaanni pinerluttulerinermi inatsimmi atuuttumi malittarisassaasat malillugit akiliisitsineq pineqaatissiissutaasinnaavoq.

Imm. 4. Inatsisartut inatsisaannik imaluunniit inatsit malillugu aalajangersakkanik unioqqutitsinermi Kalaallit Nunaanni pinerluttulerinermi inatsimmi malittarisassat malillugit arsaarinnissuteqartoqarsinnaavoq. Arsaarinnissuteqarneq landskarsimut iluaqutissatut isumagineqassaaq.

Imm. 5. Akiliisitsiissutit inatsisartut inatsisaat manna malillugu imaluunniit inatsisartut inatsisaanni aalajangersakkat malillugit pineqaatissiissutigineqartut landskarsimut pissarsiaritinneqassapput.

§ 29. Inatsisartut inatsisaat atuutsinneqalissaaq ulloq 1. januar 2013.

Namminersorlutik Oqartussat, xx.yy 2012

Kuupik Vandersee Kleist